

Na osnovu člana 13. Zakona o principima lokalne samouprave („Službene novine Federacije Bosne i Hercegovine“, broj: 49/06), člana 6. Statutame Odluke o organizaciji Grada Tuzla u skladu sa Zakonom o Gradu Tuzla („Službeni glasnik Grada Tuzla“, broj: 1/14), a u vezi sa članom 82. Zakona o poljoprivrednom zemljištu („Službene novine F BiH“, broj: 52/09), Gradsko vijeće Tuzla na sjednici održanoj dana _____ 2015. godine, donosi

ODLUKU
o agrotehničkim mjerama zaštite i korištenja poljoprivrednog zemljišta
na području grada Tuzla

I. OPĆE ODREDBE

Član 1.

Ovom Odlukom utvrđuju se agrotehničke mjere zaštite i korištenja poljoprivrednog zemljišta, te posebne mjere zaštite od požara na poljoprivrednom zemljištu, na području grada Tuzla (u daljem tekstu:Odluka) i to:

- potrebne agrotehničke mjere zaštite poljoprivrednog zemljišta u slučajevima u kojima bi propuštanje tih mjera nanijelo štetu, onemogućilo ili smanjilo poljoprivrednu proizvodnju,
- mjere za uređenje i održavanje poljoprivrednog zemljišta i
- posebne mjere zaštite od požara na poljoprivrednom zemljištu.

Član 2.

Poljoprivrednim zemljištem u smislu ove Odluke smatraju se oranice, vrtovi, voćnjaci, vinogradi i livade, kao i drugo zemljište koje se može privedi poljoprivrednoj proizvodnji.

Zemljište u građevinskom području i zemljište izvan tog područja, predviđeno prostomo-planskom dokumentacijom Kantona i Grada za izgradnju, koristi se kao poljoprivredno zemljište i mora se održavati sposobnim za poljoprivrednu proizvodnju, sve dok rješenje o odobrenju za građenje objekata, odnosno izvođenje drugih radova ne postane konačno.

II. AGROTEHNIČKE MJERE

Član 3.

Vlasnici i korisnici poljoprivrednog zemljišta dužni su navedeno zemljište obrađivati u skladu sa agrotehničkim mjerama, ne umanjujući njegovu vrijednost.

Pod agrotehničkim mjerama na poljoprivrednom zemljištu u smislu ove Odluke podrazumijevaju se mjere koje se moraju provoditi, a one su:

1. minimalni nivo obrade i održavanja poljoprivrednog zemljišta,
2. sprečavanje zakorovljenosti i obrastanja višegodišnjim raslinjem,
3. suzbijanje biljnih bolesti i štetočina,
4. korištenje i uništavanje biljnih otpadaka,

5. održavanje organske tvari u tlu,
6. održavanje povoljne strukture tla i
7. zaštita od erozije.

1. Minimalni nivo obrade i održavanja poljoprivrednog zemljišta

Član 4.

Minimalni nivo obrade i održavanja poljoprivrednog zemljišta podrazumijeva provođenje najnužnijih mjera raspoloživom tehnologijom i to posebno :

- redovno obrađivanje i održavanje poljoprivrednog zemljišta, odnosno, krčenje, čišćenje, ravnanje, niveliranje terena, te osnovnu i dopunsku obradu tla;
- održavanje ili poboljšavanje plodnosti tla,
- održavanje vinograda, voćnjaka i višegodišnjih nasada u dobrom stanju, kao i višegodišnjih kultura podignutih radi zaštite od erozije na tom tlu.

U cilju optimalnog korištenja poljoprivrednog zemljišta osnovna i dopunska obrada, kao i drugi radovi na poljoprivrednom zemljištu vrše se standardnom i atestiranom poljoprivrednom mehanizacijom u agrorokovima, kada zemljište nije pretjerano vlažno zbog očuvanja teksture i strukture zemljišta.

2. Sprečavanje zakorovljenosti i obrastanja višegodišnjim raslinjem

Član 5.

U svrhu sprječavanja zakorovljenosti i obrastanja zemljišta višegodišnjim raslinjem vlasnici i korisnici poljoprivrednog zemljišta dužni su primjenjivati odgovarajuće agrotehničke mjere obrade tla, te njege usjeva i nasada.

Vlasnik susjedne parcele dužan je redovito, posebno u neposrednoj blizini međe, kositi travu i korov, te ukloniti sve biljne ostatke, kako ne bi došlo do ometanja razvoja susjednih kultura.

Član 6.

Obavezuju se vlasnici i korisnici poljoprivrednog zemljišta, zbog zaštite zdravlja stanovništva, da unište ambroziju na poljoprivrednim površinama, međama i uz živice.

Član 7.

Vlasnici i korisnici poljoprivrednog zemljišta dužni su da u toku vegetacijske sezone, u više navrata, u periodu od aprila do kraja juna prije fenološke faze cvjetanja, pa sve do oktobra, redovno suzbijaju i uništavaju ambroziju primjenom slijedećih mjera:

- 1) agrotehničkih mjera: obradom zemljišta (oranje, zaoravanje strnjišta, tanjiranje), negom usjeva (okopavanje, međuredno kultiviranje, plijevljenje), uvođenjem i održavanjem plodoreda, pravovremenom sjetvom i prihranom kulture/kultura koje se uzgajaju;
- 2) mehaničkih mjera: kultivacijom površina (čupanjem, redovnom košnjom, spaljivanjem uništenog bilja, sjetvom kvalitetne trave čistog sjemena, formiranjem gustog i čvrstog pokrova, ustanovljavanjem cvjetnjaka ili sadnjom drveća) i dr.;
- 3) hemijskih mjera: upotrebom odgovarajućih sredstava za zaštitu bilja - herbicida (selektivnih i neselektivnih-totalnih) koji imaju odobrenje za promet i upotrebu u Federaciji BiH i koji se koriste za suzbijanje ambrozije. Sredstva za zaštitu bilja moraju se upotrebljavati u skladu sa uputstvom za primjenu koje se nalazi priloženo u pakovanju sredstva, strogo vodeći računa o vrsti i namjeni zemljišta na kojem se

sredstva primjenjuju (poljoprivredna ili nepoljoprivredna površina), kao i o njihovoj upotrebi na propisanoj udaljenosti od voda, vodotokova, izvorišta voda, jezera i sl., i na način kojim će se osigurati očuvanje kvalitete vode i vodotoka.

3. Suzbijanje biljnih bolesti i štetočina

Član 8.

U cilju suzbijanja bolesti i štetočina obavezna je primjena zaštitnih sredstava na način određen zakonom, odnosno korištenjem zaštitnih sredstava dozvoljenih osnovnim standardima proizvodnje ekološke poljoprivrede.

Vlasnici i korisnici poljoprivrednog zemljišta dužni su ambalažu od utrošenih sredstava za zaštitu bilja (posebno pesticida) uništiti, odnosno odlagati prema uputama koje su priložene uz sredstva za zaštitu.

Član 9.

Vlasnici i korisnici poljoprivrednog zemljišta u cilju sprečavanja onečišćenja poljoprivrednog zemljišta moraju:

- uništiti vegetacijsko-privredni otpad poljoprivrednog porijekla ako je ostavljen na poljoprivrednoj površini u roku od manje od jedne godine i ako nije, zaorati (kukuruzovinu) najkasnije do kraja 4. mjeseca iduće vegetacione godine;
- poštovati odredbe pozitivnih zakonskih propisa pri određivanju količine, te načina i vremena primjene gnojiva;
- privredni otpad tj. stajnjak zaorati odmah nakon nanošenja na poljoprivredno zemljište, a ukoliko je nanijet na poljoprivredno zemljište koje je udaljeno do 400 metara od stambenih objekata naselja istoga dana kada je nanijet.
- po završetku posla odmah ukloniti s poljoprivrednih površina sve ambalaže od zaštitnih sredstava koja se koriste u poljoprivrednoj proizvodnji, ostale plastične ambalaže koje su ostale od skidanja usjeva, berbe ili obrade zemljišta.

Zaštita poljoprivrednog zemljišta od onečišćenja provodi se radi omogućavanja proizvodnje zdrave hrane, radi zaštite zdravlja ljudi, životinjskog i biljnog svijeta, nesmetanog korištenja i zaštite čovjekovog životnog okoliša. S time u vezi potiče se primjena metoda ekološke (organske, biološke) poljoprivrede kao agrotehnička mjera zaštite okoliša i poljoprivrednog zemljišta.

4. Korištenje i uništavanje biljnih otpadaka

Član 10.

Agrotehničke mjere korištenja i uništavanja biljnih otpadaka, koje su vlasnici i korisnici poljoprivrednog zemljišta dužni koristiti, su slijedeće :

- obavezno uklanjanje biljnih ostataka na poljoprivrednom zemljištu nakon žetve u roku od 15 dana od žetve, te se preporučuje kompostiranje istih na propisan način;
- zaoravanje biljnih ostataka na poljoprivrednim zemljištima nakon žetve ili berbe uz prethodno usitnjavanje biljnih ostataka;
- obavezno uklanjanje suhih biljnih ostataka nakon provedenih agrotehničkih mjera u trajnim nasadima voćnjaka i ostalih trajnih nasada do 1. aprila iduće vegetacijske godine;
- obavezno odstranjivanje biljnih ostataka nakon čišćenja kanala, međa i poljskih puteva kao i nakon sječe i čišćenja šuma koje graniče sa poljoprivrednim zemljištima.

Spaljivanje i uništavanje biljnog otpada i korova na poljoprivrednom zemljištu može se vršiti samo uz poduzimanje odgovarajućih mjera zaštite od požara u skladu sa zakonom.

Spaljivanje biljnog otpada i korova zabranjeno je u razdoblju od 1. maja do 30. septembra kao i u razdobljima kada je proglašena povećana, velika i vrlo velika opasnost od požara.

5. Održavanje organske tvari u tlu

Član 11.

Preporučuje se održavanje nivo organske tvari u tlu provođenjem minimalno trogodišnjeg plodoreda prema pravilima struke. Plodored ima mnoštvo funkcija važnih za poljoprivrednu proizvodnju: održava plodnost tla, doprinosi boljoj strukturi tla, reguliše bolesti, štetnike i korove, smanjuje gubitak hranjiva ispiranjem zemlje, te sprečeva i minimizira eroziju.

5.1. Primjena organskih i mineralnih đubriva

Član 12.

Organska gnojiva moraju se primjenjivati u skladu sa načelima dobre poljoprivredne prakse, osobinama staništa, stepenu opskrbljenosti poljoprivrednog tla hranjivima, potrebama pojedinih kultura za hranjivima i planiranim prinosima i drugim važećim propisima koji se na njih odnose.

Član 13.

Maksimalno dozvoljena količina primjene tečnih organskih gnojiva na poljoprivredno tlo je 40 m³/ha/god., a izvan vegetacijskom razdoblju (oktobar- april) do 20 m³/ha.

U toku jedne kalendarske godine poljoprivredno gospodarstvo može gnojiti poljoprivredne površine stajskim gnojem do slijedećih graničnih vrijednosti primjene azota:

- 210 kg/ha azota (N), dozvoljena primjena u početnom četverogodišnjem razdoblju;
- 170 kg/ha azota (N), dozvoljena primjena nakon isteka četverogodišnjeg razdoblja.

Član 14.

Vlasnici i korisnici poljoprivrednog zemljišta ne smiju koristiti tečna gnojiva:

1. na područjima izloženim velikom riziku od zagađenja;
2. na poljoprivrednom tlu zasićenom vodom, pokrivenim snijegom i smrznutom poljoprivrednom tlu;
3. u proizvodnji povrća, jagodastog voća, ljekovitog i krmnog bilja unutar 30 dana prije zriobe i berbe;
4. na travnjacima koji se koriste za ispašu stoke;
5. s gospodarstava na kojima su utvrđene bolesti s uzročnicima otpornim na uslove u gnojišnoj jami;
6. u priobalnom pojasu, uz vodotoke do 10 m udaljenosti, uz stajaće vode do 70 m udaljenosti, te na vodozaštitnom području;
7. pomiješane s gradskim muljem, kompostom od gradskog mulja i otpada;
8. na poljoprivrednom zemljištu bez zelenog pokrivača.

Član 15.

Vlasnici i korisnici poljoprivrednog zemljišta otpad biljnog porijekla, organski otpad koji nije životinjskog porijekla, organski kuhinjski otpad mogu koristiti u vlastitim vrtovima ako je namijenjen za poljoprivrednu proizvodnju za vlastite potrebe i ako se koristi na istom mjestu gdje je i proizveden.

Član 16.

Mineralna gnojiva vlasnici i korisnici poljoprivrednog zemljišta moraju primjenjivati u skladu sa načelima dobre poljoprivredne prakse, osobinama staništa, stepenu opskrbljenosti poljoprivrednog tla hranjivima, potrebama pojedinih kultura za hranjivima i planiranim prinosima, te u skladu s dozvolom za stavljanje u promet i drugim važećim propisima koji se na njih odnose.

Mineralno gnojivo se smatra onečišćenim kada sadrži više od 40 mg Cd/kg P₂O₅.

Član 17.

Upotreba mineralnih gnojiva se mora zasnivati na stanju osiguranosti tla sa potrebnim hranjivima. U cilju racionalnog korištenja mineralnih gnojiva potrebno je vršiti kontrolu plodnosti tla.

Fizička i pravna lica, vlasnici ili korisnici poljoprivrednog zemljišta, dužni su provoditi sistemsku kontrolu plodnosti zemljišta koje je katastarskim klasiranjem svrstano od 1. do 4. katastarske klase obradivog poljoprivrednog zemljišta površine veće od 0,2 ha.

Vlasnici i korisnici poljoprivrednog zemljišta ovu mjeru moraju provoditi svake pete godine.

Sistemsku kontrolu plodnosti zemljišta vrši institucija koja u pogledu kadrova i opreme ispunjava propisane uvjete.

Član 18.

Vlasnicima i korisnicima poljoprivrednog zemljišta na udaljenosti 200 m od vodocrpilišta zabranjuje se bilo kakva gnojidba organskim ili mineralnim gnojivima i preoravanje travnjaka.

6. Održavanje povoljne strukture tla

Član 19.

Korištenje mehanizacije na poljoprivrednim zemljištima mora biti primjereno stanju i svojstvima zemljišta tako da se u uvjetima mokrog i vodom natopljenog zemljišta preporučuje izbjegavanje obrade i provoza mehanizacije.

7. Zaštita od erozije

Član 20.

Erozija je prirodni proces pomicanja krutih tvari djelovanjem vjetra, vode, ili pomicanja koja su uvjetovana silom gravitacije.

U svrhu zaštite poljoprivrednog zemljišta od erozije određuju se sljedeće mjere :

- ograničenja ili potpuna zabrana sječe dugogodišnjih nasada, osim sječe iz agrotehničkih razloga;
- održavanje dugogodišnjih zasada podignutih radi zaštite od erozije na zemljištu,
- ograničavanje iskorištavanja pašnjaka propisivanjem vrste i broja stoke, te vremena i načina ispaše,
- zabrana preoravanja livada, pašnjaka i neobrađenih površina na strmim zemljištima i njihovo pretvaranje u oranice s jednogodišnjim kulturama;
- zabrana skidanja humusnog, odnosno oraničnog sloja površine poljoprivrednog zemljišta;
- zabrana preoravanja livada, pašnjaka i neobrađenih površina na strmim zemljištima i njihovo pretvaranje

- u oranice zasijane jednogodišnjim kulturama;
- zatravljivanje i sadnja višegodišnjih kultura na strmom zemljištu sa nagibom većim od 25%;
 - podizanje i uzgoj poljozaštitnih pojaseva i druge mjere.
- Pored navedenih mjera potrebno je da vlasnici i korisnici poljoprivredno zemljište zaštite od erozije primjenjujući i slijedeće mjere:
- zemljište nagiba od 1-3% - uređenje vodnog režima, konturnu sadnju i obradu, te uvođenje plodoređa;
 - zemljište nagiba od 3-7% - uređenje vodnog režima, redovnu gnojidbu i međuredno zatravljivanje;
 - zemljište nagiba od 7-9% - uređenje vodnog režima, pravilan plodored, redovna gnojidba, postepeno uvođenje konturih stepenastih terasa;
 - zemljište nagiba preko 9% - obrada zemljišta po izohipsama i uvođenje konturih stepenastih terasa.

Vlasnici i korisnici poljoprivrednog zemljišta dužni su održavati dugogodišnje nasade i višegodišnje kulture podignute radi zaštite od erozije na tom zemljištu.

III. MJERE ZA UREĐIVANJE I ODRŽAVANJE POLJOPRIVREDNOG ZEMLJIŠTA

Član 21.

Zabranjeno je svako pošumljavanje poljoprivrednog zemljišta iz člana 2. stav 1. ove Odluke, a također se zabranjuje nasipanje poljoprivrednog zemljišta građevinskim otpadom i drugim materijalom.

Mjere za uređivanje i održavanje poljoprivrednog zemljišta su :

1. održavanje živica i međa,
2. održavanje poljskih puteva,
3. uređivanje i održavanje kanala,
4. sprečavanje zasjenjivanja susjednih čestica i
5. sadnja i održavanje vjetrozaštitnih pojasa.

1. Održavanje živica i međa

Član 22.

Vlasnici i korisnici poljoprivrednog zemljišta dužni su održavati i uređivati živice na svom zemljištu na način da spriječe njihovo širenje na susjedno obradivo zemljište i puteve, zasjenjivanje susjednih parcela, te da spriječe njenu zakorovljenost.

Obaveza vlasnika je formiranje živice na način da se ne ometa promet, vidljivost i preglednost poljskih puteva.

Živice uz poljske puteve i međe mogu se zasaditi najmanje 40 cm od ruba poljskog puta odnosno međe i ne mogu biti šire od 40 cm, te se u svrhu sprečavanja zasjenjivanja susjednih parcela moraju orezivati tako da njihova visina ne prelazi 1 m.

Član 23.

Vlasnici i korisnici poljoprivrednog zemljišta dužni su održavati međe tako da budu vidljivo označene, očišćene od korova i višegodišnjeg rastinja, te da ne ometaju provođenje agrotehničkih mjera na susjednim parcelama.

2. Održavanje poljskih puteva

Član 24.

Vlasnici i korisnici poljoprivrednog zemljišta dužni su zajednički brinuti o održavanju poljskih puteva koje koriste.

Poljske puteve u privatnom vlasništvu uređuju i održavaju njihovi vlasnici.

Član 25.

Pod održavanjem poljskih puteva smatra se naročito :

- nasipanje odgovarajućim materijalom (kameni agregat, šljunak i sl.)
- čišćenje i održavanje jaraka uz poljske puteve,
- čišćenje i održavanje cijevnih propusta,
- održavanje živica i drugog raslinja uz poljske puteve,
- sječa pojedinih stabala, grmlja ili grana koje sprječavaju korištenje poljskog puta i
- sprječavanje oštećenja ili uzurpacije puteva.

Član 26.

Zabranjuju se sve radnje koje mogu dovesti do uništavanja poljskih puteva, a naročito:

- preoravanje poljskih puteva,
- sužavanje poljskih putova preoravanjem,
- uništavanje zelenog pojasa uz poljske puteve,
- nanošenje zemlje i raslinja na poljske puteve prilikom obrađivanja zemljišta.

Član 27.

Obavezuju se vlasnici i korisnici poljoprivrednog zemljišta da saniraju poljski put o svom trošku ako su ga oštetili određenim radnjama.

Poljski put je također potrebno očistiti od eventualnog nanosa zemlje, biljnog otpada ili raslinja prilikom obrade zemljišta.

Član 28.

Vlasnici i korisnici poljoprivrednog zemljišta imaju zakonom ustanovljenu služnost prolaza zbog prilaza poljoprivrednim parcelama u svrhu njihove obrade i ako je prolaz nužan.

Služnost prolaza traje dok poljski radovi ne budu završeni (oranje, sjetva, žetva, berba i drugi poslovi).

Član 29.

Vlasnici i korisnici poljoprivrednog zemljišta moraju dozvoliti pristup na svoja zemljišta radnicima poljoprivrednih, geodetskih, geoloških, vodoprivrednih i drugih organizacija koje vrše radove (mjerenje, snimanje, projektovanje, obilježavanje) u vezi sa pripremom i izvođenjem agrarnih operacija i djelovanjem, kao i održavanje melioracijskih objekata i uređaja, ali vlasnici i korisnici poljoprivrednog zemljišta imaju pravo na nadoknadu prouzrokovane štete.

Gradski organ može ustanoviti stvarnu služnost oticanja vode preko tuđeg zemljišta, ako se oticanje ne može riješiti na drugi način.

Sezonsku služnost, procjenu štete i visinu naknade usljed oticanja vode preko zemljišta određuje gradski organ, a naknadu štete vrši korisnik sezonske služnosti.

3. Uređivanje i održavanje kanala

Član 30.

Vlasnici i korisnici poljoprivrednog zemljišta dužni su održavati i čistiti prirodno stvorene ili izgrađene kanale, tako da se spriječi odronjavanje zemlje, zarastanje korovima i raslinjem, odnosno da se omogući prirodni tok oborinskih voda.

Zabranjuje se svako zatrpavanje kanala osim u slučajevima kada se to radi na osnovu projektne dokumentacije i valjane dozvole nadležnih organa koju je pribavio vlasnik odnosno korisnik poljoprivrednog zemljišta.

4. Sprečavanje zasjenjivanja susjednih čestica

Član 31.

Vlasnici i korisnici poljoprivrednog zemljišta ne smiju sadnjom voćaka ili drugih visoko rastućih kultura zasjeniti susjedne parcele, te time onemogućiti ili otežati poljoprivrednu proizvodnju na tim parcelama.

Pojedinačna stabla i trajni nasadi sade se na način da ne nanose štetu susjednim česticama zasjenjivanjem, primjereno odmaknuta od međe, odnosno moraju se saditi na razdaljini od tri metra od međe susjedne parcele. Zabranjuje se sadnja visokog raslinja neposredno uz među. Vlasnici i korisnici poljoprivrednog zemljišta postojeća stabla u ogradama u međi moraju održavati tako da grane drveća redovno orezuju da ne bi zasjenjivale susjednu parcelu, te održavati i sprječavati rast žila i korijenja u susjednu parcelu.

Za štetu koju su susjednoj nekretnini prouzročile žile, korijenje ili grane tuđeg drveća, a što se ne bi dogodilo da je njihov vlasnik postupao dovoljno obzirno, vlasnik susjednoga zemljišta ima pravo tražiti naknadu. Naknadu štete nadoknađuje vlasnik ili korisnik poljoprivrednog zemljišta na kojem se nalazi drveće koje nije održavano u skladu sa odredbama ovog člana u iznosu koji utvrde sporazumno, a ako se ne postigne sporazum, visinu naknade za učinjenu štetu određuje nadležni sud.

5. Sadnja i održavanje vjetrozaštitnih pojasa

Član 32.

Vlasnicima i korisnicima poljoprivrednog zemljišta utvrđuje se obaveza sadnje vjetrozaštitnih pojaseva na područjima na kojima je zbog izloženosti vjetru većeg intenziteta ili dužeg trajanja poljoprivredna proizvodnja otežana ili smanjena. To su poljoprivredna zemljišta koja se nalaze uz saobraćajnice, vodotoke, kanale, zemljišta sa nagibima od 10% do 25%, kao i ostala zemljišta na kojima je otežana ili smanjena poljoprivredna proizvodnja usljed djelovanja vjetra. Vjetrozaštitni pojas može se izvesti sadnjom živice ili drugih dugogodišnjih visokih nasada, a vlasnik ih je dužan primjereno održavati.

Vjetrozaštitni pojasi uz saobraćajnice formiraju se na udaljenosti od vanjskog ruba zemljišnog pojasa tako da je u pravilu širok sa svake strane:

- brze ceste 30 m,
- magistralne ceste 20 m,
- regionalne ceste 10 m,

- lokalne ceste 5 m.

Živicu, grmlje i krošnje drveća koje se nalazi na zemljišnom pojasu treba održavati u skladu sa hortikultumom tehnologijom tako da ne zaklanjaju prometnu signalizaciju, ne umanjuju preglednost ceste, ne ulaze u gabarit ceste, odnosno da svojim položajem i stanjem ne ugrožavaju sigurnost prometa.

Vjetrozaštitni pojasi uz vodotoke formiraju se na udaljenosti većoj od 10 metara od nožice nasipa.

Vjetrozaštitni pojasi uz kanale za odvodnjavanje atmosferskih voda formiraju se najmanje jedan metar od kanala.

Na zemljištima sa nagibima od 10% do 25% vjetrozaštitne pojaseve formirati na način kako je to navedeno u članu 31. stav 2. ove Odluke i to okomitom sadnjom u odnosu na pravac dejstva dominantnog vjetra na poljoprivrednom zemljištu vlasnika i korisnika.

Na ostalom zemljištu vjetrozaštitne pojase formirati okomito u odnosu na pravac dejstva dominantnog vjetra, a u skladu sa ostalim mjerama propisanim u ovoj Odluci.

IV. POSEBNE MJERE ZAŠTITA OD POŽARA

Član 33.

Posebnim mjerama zaštite od požara na poljoprivrednom zemljištu, u smislu ove Odluke smatraju se mjere koje se moraju provoditi u cilju sprečavanja pojava i širenja požara. Stoga su vlasnici i korisnici dužni poduzeti slijedeće mjere :

- održavati, uređivati i čistiti međe, živice, kanale, te poljske i šumske puteve,
- uklanjati suhe biljne ostatke nakon provedenih agrotehničkih mjera, a najkasnije do 1. aprila tekuće godine,
- sprječavati zatravljanje i obrastanje zemljišta višegodišnjim korovima i raslinjem,
- nakon sječe i čišćenja šume ostatke sakupljati na ravnomjerno raspoređene hrpe ili redove,

Član 34.

Biljne ostatke zabranjeno je spaljivati na otvorenom prostoru u periodu od 1. maja do 30. septembra tekuće godine. Spaljivanje se može obavljati u preostalom dijelu godine za mirna vremena, a zabranjuje se spaljivanje za vrijeme vjetrovitog vremena.

Član 35.

Za uništavanje korova i biljnog otpada spaljivanjem vlasnici i korisnici poljoprivrednog zemljišta dužni su poduzeti slijedeće mjere:

- obavijestiti gradsku Vatrogasnu jedinicu o mjestu i vremenu spaljivanja,
- spaljivanje obavljati na dijelu zemljišta koje je sigurno u smislu ne širenja vatre, te da površina na kojoj se vrši spaljivanje bude očišćena od trave i drugog gorivog materijala,
- spaljivanju moraju biti prisutne osobe koje vrše spaljivanje i to od zapaljenja vatre do njenog potpunog sagorijevanja, a po potrebi i procjeni biti će prisutni i vatrogasci, nakon čega se obavezno vrši pregled mjesta loženja, te je potrebno ostatke sagorijevanja u potpunosti pogasiti vodom,
- prilikom spaljivanja potrebno je raspolagati osnovnom opremom za gašenje požara (lopata, kanta napunjena vodom i sl.).

V. NADZOR

Član 36.

Nadzor nad provedbom ove Odluke vrše nadležna tijela državne uprave i nadležni inspektori pri kantonalnoj upravi za inspeksijske poslove Tuzlanskog kantona.

Ovlaštena tijela iz prethodnog stava imaju pravo poduzimati radnje i nalagati poduzimanje određenih mjera u skladu sa Zakonom, propisa donesenih na osnovu zakona, kao i Prekršajnog zakona.

VI. KAZNE NE ODREDBE

Član 37.

Za ne provođenje mjera propisanih ovom Odlukom primjenit će se kaznene odredbe propisane članovima od 138. do 141. Zakona o poljoprivrednom zemljištu ("Službene novine Federacije BiH", broj:52/09).

VII. PRIJELAZNE I ZAVRŠNE ODREDBE

Član 38.

Ova Odluka stupa na snagu danom donošenja, a objavit će se u "Službenom glasniku Grada Tuzla".

Bosna i Hercegovina
Federacija Bosne i Hercegovine
Tuzlanski kanton
Grad Tuzla
GRADSKO VIJEĆE
Broj: 01- _____ -2015
Tuzla, _____ 2015. godine

Predsjedavajući Gradskog vijeća

Jozo Nišandžić, prof.

Obrazloženje

Pravni osnov za donošenje ove Odluke sadržan je u poglavlju V, tačka 3, član 82. Zakona o poljoprivrednom zemljištu („Službene novine F BiH“, broj 52/09), kojim je definisano da je gradsko-općinsko vijeće dužno propisati agrotehničke mjere zaštite i korištenja poljoprivrednog zemljišta.

Mjere zaštite i korištenja poljoprivrednog zemljišta provode se u cilju tehničkog uređenja, poboljšanja proizvodnih osobina, regulisanja vodnog režima tla, te sprečavanja oštećenja i zagađenja zemljišta prouzrokovanog prirodnim pojavama ili ekonomskim i društvenim aktivnostima.

Odluka o agrotehničkim mjerama zaštite i korištenja poljoprivrednog zemljišta je u skladu sa Programom gospodarenja poljoprivrednim zemljištem u vlasništvu države na području općine Tuzla broj: 01-24-3813-2014, od 28.08.2014 godine, kojim je, pored ostalog, predviđeno detaljnije regulisanje agrotehničkih mjera zaštite i korištenja poljoprivrednog zemljišta, pa je s tim u vezi pripremljena predmetna Odluka.

Pri izradi Odluke konsultovane su odredbe Zakona o poljoprivrednom zemljištu, Pravilnika o utvrđivanju dozvoljenih količina štetnih i opasnih tvari u zemljištu i metode njegovog ispitivanja („Službene novine F BiH“, broj 72/09), Zakona o zaštiti i spašavanju ljudi i materijalnih dobara od prirodnih i drugih nesreća („Službene novine F BiH“, broj 39/03, 22/06 i 43/10), Zakona o cestama Federacije Bosne i Hercegovine („Službene novine F BiH“, broj 17/14), te stručna literatura iz oblasti zaštite i korištenja poljoprivrednog zemljišta.

Obradivač:

Služba za razvoj, poduzetništvo i
društvene djelatnosti